

12. januar 2016

UPA 2016/66

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Nunatsinni ujaqqanik pinnerasaasiassanik aatsitassanillu katersisinnaanermut kiisalu annikitsumik aatsitassarsiorluni ujaqqanik piiaanissamut akuersissummik tunniussinissamut inatsisitigut immikkut aalajangersaanissamut UPA 2017-imi suliniuteqaqqullugit Naaalakkersuisut inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq).

Tungavilersuut:

Maannakut aatsitassanut inatsisip atuuttup iluani ujaqqat pinnerasaasiassat ujaqqallu allat pillugit aalajangersakkat assigiinngitsut atuutsinneqarput. Ujaqqanik erlinnartunik imaluunniit pinnerasaasiassanik oqaraangatta, taakku aatsinneqarsinnaaneri siullerpaajutillugu eqqarsaatigineq ajorpavut.

Kalaallit Nunaanni ujaqqanut pinnerasaasiassanut inuussutissarsiuteqarnermik ineriartortitsinissamut inuiaqatigiinni periarfissat pillugit nassuiaat imartooq innersuussutigalugu, tassani ilaatigut atuarneqarsinnaapput:

“Annikitsumik aatsitassarsiornissamut pisinnaatitsissummik peqartut ujaqqanik pinnerasaasiassanut suliaqarfimmi ilisimasaannik annertusititsinissamut pitsaanerusunik periarfissaqarnissaat pingaaruteqartoq. Ilaatigut suliassat ilagissavaat Aatsitassanut Ikummatissanullu Naalakkersuisoqarfiup ujarassiornermut immikkoortorta qarfiata suliassamut siuttuunissaa. Suliaqarfinni suliassanik pilersaarusiornermi, ujarassiornermi aamma ujaqqanik pinnerasaasiassalerinermi atuartitsineq, ujaqqanik pinnerasaasiassanik pisussaaffiliinngitsumik missiliuilluni naliliisarneq kiisalu paasissutissiinnermut atortussanik suliaqarneq, tamarmik suliassanut assersuutissaapput annikitsumik aatsitassarsiornermik

inuussutissarsiuteqarnermik toqqaannartumik nukittorsaasussat, aammalu uuliasiornermi aatsitassanullu periusissami siunnerfiusunut pitsaalluinnartumik naapertuullutik”.

Taamaattumik aatsitassarsiornermut olie-siornermullu inatsimmiit, immikkoortillugit ujarassiornermut tunngasut immikkut inatsiseqartinneqalerpata, tamanna tamanut ajunngitsumik kinguneqarumaartoq takorloorneqarsinnaavoq.

Nalunngilarput ujaqqat pinneraasiassat, ujaqqallu erlinnartut soqutigineqarnerat annertusiartortoq.

Kisianni aamma nalunngilarput, ujaqqat pineqartut piiarneqarunik ikiliartuinnartussaasut, ilami allaat ajornerpaaffia tikinneqarput nungunneqarsinnaasut.

Taamaattumik maannangaaq taakku immikkut inatsisiliuunnissaat pisariaqarsoraarput, minnerunngitsumik ujaqqat nunatsinnut maanilu najungaqaqtunut annertunerpaamik iluanaarutigineqarnissaat qulakkeerniarlugu.

Isumaqaarpugut inatsisiliornermi nunatta inuisalu salliutinneqarnissaat qulakkeertariaqartoq, tassami ukiorpassuarni takusareerparput, nunatta pisuussuterpassuit, uumaatsut uumassusillillu nunani allamiuniit annissuunneqartut, annissuunneqartarsimasullu.

Nunarput aningaasassaaleqivoq, taamaammat ujaqqat pinneraasiassat – atagu uagulli nammineq iluaqutiginiarniartigit. Nunatsinni kusanartuliortartunik pikkorissorpassuarnik peqarpugut, tamakku salliutillugit pitsaanagerusunik inatsisikkut periarfissinniartigit !

Pisortani aningaasaqarnikkut allaffissornikkullu kingunerisassat:

Misissuisitsinerup suliarinera nalilerneqarpoq 300.000 kr.-inik akeqarumaartoq. Tassani nutserinermut il.il. aningaasaliissutit ilanngullugit. Ilimanarportaaq misissuinerup suliarinerata ingerlanerani inatsimmik allannortitsiniarnermut tunngatillugu suleqataasunik naleqquttunik suliamut tunngasunik oqaloqatigiittarnissamut allaffissornikkut isumalluusiisoqartariaqassasoq. Tamatuma saniatigut inatsimmik tusarniaaneq aamma ingerlanneqassaaq taannalu allaffissornikkut aamma immikkut nukinnik atuiffiussaaq.

Inatsisissatut siunnersuutip suliarineqarnerata aningaasalersorneqarnissaa Aatsitassanut ikummatissanullu Aqutsisoqarfiup ataaniippoq, AI2016 konto pingaarneq 66.01.01-mi

allattorsimasut takukkit. Tassani ilimanaateqarmat aningaasaliissutaasut sipporneqassammata, siunnersuut ilalorneqassappat konto pingaarnermi aningaasaliissutinik qaffaanissaq pisariaqartinneqassaaq. Aningaasaliissutissallu pingaarnersiukkaniit allaniit aaneqartariaqassapput taamaammat Inatsisartut siunnersuut oqaluuserilerunikku aamma ilanngullugu eqqartortariaqassavaat, Inatsisartut siunnersuut akuerissagunikku AI2017-mi aningaasartuutissat aningaasaliissutissatut pingaarnersiukkatut nalunaarsorneqassut.

Siunnersuutip aningaasaqarnikkut kingunerisinnaasai:

Namminersortunut kinguneqarumaarpoq.

Siunnersuutip allaffissornikkut kingunissai:

Innuttaasunut toqqaannartumik kinguneqassanngilaq aalajangiiffigisassatut siunnersuutip akuerineqarnerata innuttaasut aningaasaqarnikkut allaffissornikkullu eqqussanngimmagit.